

Carnaval 63 a conoce su dos Reina di Tumberito Infantil y Hubenil

RIBA diadomingo den un Entertainment Center yen di ambiente a corona dos Reina di Festival di Tumberito. Despues di a gosa di presentacion di 11 participante den categoria infantil y 3 den categoria hubenil, sigur e tension a keda te na ultimo momentonan pa sa kico e resultadonan lo bira.

Den categoria Infantil a keda eligi un bes mas e hobencita Sendy Loefstok como Reina di Festival di Tumberito 2017. Su cantica "Saluda Carnaval" sigur a haci un cos cu e publico. E finalistanan ta: 5.) Genevan Maduro cu "Carnaval ta Yama"; 4.) Jayvic Piar cu "Awa"; 3.) Xenon Daal cu "Ambiente di Coco"; 2.) Asia Libiee cu "Mi Tumba".

Trahe Carnavalesco a bay pa Xenon Daal. Popular a bay pa Asia Libiee. Rookie of the year a bay pa Asia Libiee. New-comer ta Ezahayra Arteaga y e premio Social Media a bay pa Jayvic Piar.

E categoria hubenil a conta cu tres hobencita, cu un caliber halto di Tumba.

Tur tres a resona tremendamente. E suspenso tambe a reina pa loke ta e resultadonan.

Na final a eligi un veterano di Festival di Tumberito srta. Mary-Jane Vrolijk cu "Ban Yen'e Cu Color". Esaki por cierto ta Mary-Jane su ultimo participacion y sigur ta spera cu den futuro nos por mir'e den Aruba su Festival di Tumba tambe. E finalistanan ta: 3. Eshlaine Panneflekk cu "Ban nos Para Pe", 2. Zhaisky Kock cu "Nos tur ta Ruman". Mester menciona cu cada un di e tres Tumbanan aki a zona tremendo riba e escenario. Nos ta spera di sigui mira tur di nan den nos futuro festivalnan.

Trahe Carnavalesco a bay pa Mary-Jane Vrolijk. Titulo Popular tambe a bay pa Mary-Jane Vrolijk y premio Social Media a ser gana pa Mary-Jane Vrolijk.

Durante momentonan di conteo di punto di parti di hurado, e publico presente a gosa di un dushi presentacion di nos Rey di Tumba, Jerrino "Bass" Ridderstap cu Banda D'Liscious.

Nan a pone tur hende riba pia te hasta cantando y gosando cu tur e muchanan presente dilanti di stage. Por mira atras riba un Festival di Tumberito exitoso.

Pabien na tur participante pa nan bon presentacion y aporte na nos Carnaval. Un gradicimento na Comision di Tumberito, director musical Rodney van der Biezen hunto cu e All-Star Band cu a compaña tur e muchanan y hobennan y tambe na e publico presente pa e apoyo.